

Mereseendo Pabien

“Pabien” ta un palabra ku nos ta usa pa ekspresá nos alegría pa lógro di un persona. Durante bida, ku frekuensia nos ta risibí i duna pabien.

Tin ora sigur “pabien” ta meresí. Sigur “pabien” ta na su lugá ora un alumno ta studia duru i ta haña un bon sífra. E atleta ku a tren, soda, i sufri hopi tortúra físiko ta meresé “pabien” ora e ta titulá kampion den su deporte. E empleado ku ta konfiabel, puntual, ta bon trahadó, èts. korektamente ta felisitá pa su esfuersonan. Un bon mama ta meresé ekspreshonnan asina... anto no riba Dia di Mama so...

Ma tin ora nos ta puntra nos mes si ta korekto pa usa e palabra “pabien”. No ta ku nos no ta kontentu huntu ku òf pa e persona. Ma nos ta kuestioná si e ta un lógro di bèrdat. Por ehèmpel, nos ta duna pabien na ruman, tanta, tio, welo, wela, primo, prima, bisña, èts. di un persona ku ta hasi aña. Kiko e personanan ei a hasi ku nan ta meresé “pabien”? Asta nos ta hasi nos mes e pregunta dikon nos ta felisitá e persona ku ta kumpli un aña mas di bida. Kiko presis tabata e lógro? Nos ta felisit’é pasobra su kurason a sigui bati, su pulmon a sigui funshoná, i el a sobreviví 365 dia mas?

Nos tin e mesun duda pa ku un sertamen di beyesa. Ningun di nos por determiná kon nos ta parse—sea ku nos ta koló kla òf skur, sea ta kabei las òf krin, sea nos ta haltu òf kortiku, èts. Ta bèrdat ku tin siertu kos ku e “Missnan” ta hasi pa mantené e kurpa nèchi. Ma di gran parti, Dios ta Esun ku nos tin ku felisitá pasobra El a krea e beyesa.

I ta korekto pa duna “pabien” ora un persona no-kasá—dor di un akto immoral, violando Palabra di Dios—ta duna lus?

Mi pensamentu ta bai den e direkshon aki pa un motibu hopi personal. Luna pasá mi mayornan a kumpli 60 aña kasá. Mi a keda pensa tokante e lógro ei. **Un aniversario—60 òf 6 aña—sigur ta un lógro grandi, mereseendo tur klase di “pabien”!**

Ora bo ta kasa, bo ta kasa ku un persona imperfekto, ku ta faya, ku lo desapuntábo—meskos ku abo... Dos pekadó bibando bou di ún dak ta un reseta pa diferensia di opinion, klèsh, i pasa riba otro. Boso tin ku siña biba ku otro—ahustá pensamentunan, kustumbernan, preferensianan, èts. na otro. E proseso ei no ta fásil; e ta tuma añanan. Mas aña nan ta kasá, mas nan ta ahustá na sistema di otro. Kada aña nan por selebrá ku nan ta ahustá na otro—i ta komuniká mihó—apesar di e luchanan!

Awendia un aniversario ta un lógro mas grandi ku den pasado. Tin hopi influensia kontra matrimonial den nos era aktual ku no tabatin den pasado. Divorsio ta mas i mas komún. Hende di sekso opuesto no ke kasa, nan ke biba ku otro; mientras hende di mesun sekso no ke biba ku otro, nan ke kasa. Aki poko aña, homoseksualnan so ta selebrá un aniversario matrimonial... loke sigur NUNKA ta meresé pabien! Hende di ambos sekso no ta respetá matrimonio mas i ta “yag” riba hende kasá. Pronografia i pelíkulanan ta enkurashá hende kasá pa lubidá nan promesanan matrimonial. **Ta un lógro grandi ora un pareha ta keda fiel na otro apesar di tur e kontratiempo!**

Palabra di Dios ta bisa, “...e muhé kasá, segun lei, ta mará na su esposo tanten ku su esposo ta na bida...nan no ta dos mas, sino ún karni. Pesei loke Dios a uni, no laga ningun hende separá” (Romanonan 7:2; Mateo 19:6). Na kasamentu, e pareha ta primintí di keda fiel ta otro den tur sirkunstansia di bida te na morto. Esei ta entréga total bida largu. **Dedikashon di esposo i esposa sigur ta meresé felisitashon** den un era ku egoísmo, propio interes, i rebeldia ta manda.

Kada aña ku un pareha ta pone interes di su kasá dilanti i ta sakrifiká su mes p’è sigur ta un ehèmpel i un evento ku ta meresé pabien!